

BERGRIVIER MUNISIPALITEIT VERORDENING INSAKE DIE SKUT VAN DIERE

Kragtens die bepalings van artikel 156 van die Grondwet van Suid-Afrika, 1996, bepaal die Bergrivier Munisipaliteit hiermee soos volg:

Inhoud

1. Woordoms krywing
2. Doel van verordening
3. Skut van diere
4. Skut waarheen diere gestuur moet word
5. Aanneem van diere deur skutmeester
6. Ontvangsbewys vir geskutte diere
7. Getal kampe
8. Afmaak van gevaarlike of aansteeklike diere
9. Kennisgewing van geskutte diere
10. Byhou van skutregister
11. Insaë in en uittreksels uit skutregister
12. Voorlegging van skutregisterinskrywings na skutverkoop
13. Insaë in skutregister op plek van verkoping
14. Skuttariëwe
15. Betaling
16. Kennisgewing van verkoping
17. Afslaer
18. Verkoping van diere
19. Onwettige skut van diere en boetes
20. Verhaal van verlies ten opsigte van diere geskut uit gebied van ander munisipaliteit
21. Gebruik, aanhouding en mishandeling van diere
22. Appél
23. Strafbepalings
24. Teenstrydigheid met ander wetgewing
25. Herroeping van verordeninge
26. Kort titel en inwerkingtreding

1. Woordoms krywing

In hierdie verordening, tensy dit uit die samehang anders blyk, beteken: -

"bees" 'n bul, koei, os, vers, tollie en kalf;

"bok" 'n ram, ooi, kapater en lam;

"dier" 'n lid van die perdefamilie, 'n bees, skaap, bok, vark, hoender, volstruis, hond, kat of ander huisdier of voël of 'n wilde dier, wilde voël of reptiel wat in gevangenskap verkeer of onder iemand se beheer is;

"eienaar " met betrekking tot 'n dier, enige iemand wat in besit is van of belas is met die sorg, bewaring of beheer van 'n dier;

"hings" 'n perd, donkie- of muilhings wat nie gekastreer is nie of wat gedeeltelik gekastreer is;

"munisipaliteit" die Bergrivier Munisipaliteit gestig ingevolge Artikel 12 van die Munisipale Strukturewet, 117 van 1998, en sluit in enige politieke struktuur, politieke ampsbekleder, raadslid, behoorlik gevolmagtigde agent daarvan of enige werknemer daarvan handelende ingevolge hierdie verordening uit hoofde van 'n bevoegdheid van die munisipaliteit wat gedelegeer of gesubdelegeer is aan gemelde politieke struktuur, politieke ampsbekleder, raadslid, agent of werknemer;

"okkupeerder" 'n persoon wat werklik grond okkupeer, of wat as eienaar geregtig is om grond te okkupeer;

"perd" 'n hings, merrie, reunperd, hingsvul, merrievul, donkie en muil;

"skaap" 'n ram, ooi, hamel en lam;

"skut" 'n fasiliteit bestaande uit een of meer geboue, hokke of kampe, wat deur die munisipaliteit voorsien mag word en geplaas is onder die beheer van 'n skutmeester of 'n diensverskaffer ingevolge 'n diensleweringsooreenkoms met die munisipaliteit, en wat geskep is om afgedwaalde, verdwaalde, verlore of loslopende diere te huisves en te versorg;

"skutmeester" 'n persoon wat of-

- (a) 'n deelydse of heelydse werknemer van 'n munisipaliteit is; of
- (b) kragtens 'n diensleweringsooreenkoms aangestel word, om 'n skut aan te hou en te bedryf; en

"veearts" 'n persoon wat as sodanig gekwalifiseerd is ooreenkomstig die bepalinge van die Wet op Veterinêre en Para-Veterinêre Beroepe, 1982 (Wet 19 van 1982), en

2. Doel van verordening

Die doel van hierdie verordening is om voorsiening te maak vir geriewe vir die huisvesting en versorging van diere wat afgedwaal of verlore is asook vir die prosedures, metodes en praktyke om die skut van sodanige diere te bestuur.

3. Skut van diere

Enige persoon kan 'n dier wat hom in of op 'n straat, pad, padreserwe of openbare plek bevind en wat nie in die sorg van iemand is nie, skut.

4. Skut waarheen diere gestuur moet word

Enige persoon op wie se grond diere gevind word wat daarop oortree kan sodanige diere na die naaste skut stuur of na sodanige ander skut wat deur die munisipaliteit aangewys is.

5. Aanneem van diere deur skutmeester

(1) Dit is die plig van elke skutmeester om alle diere onder sy sorg te neem wat gedurende die ure wat deur die munisipaliteit vasgestel is na die skut gebring word.

(2) 'n Skutmeester wat onredelik weier of versuim om diere te ontvang wat soos voornoem na die skut gebring word, is skuldig aan 'n misdryf, en is bykomend aanspreeklik vir alle skade wat die eienaar van genoemde diere of enige ander persoon ly weens sodanige weiering of versuim.

6. Ontvangsbewys vir geskutte diere

Elke skutmeester moet aan die persoon wat diere onder sy of haar sorg laat, 'n skriftelike ontvangsbewys gee waarin die getal en beskrywing van die diere uiteengesit word.

7. Getal kampe

Die munisipaliteit moet afsonderlike kampe in 'n goeie toestand, en sover moontlik vry van alle besmetting, in stand hou vir-

- (a) volstruise en perde;
- (b) beeste,
- (c) skape, bokke en varke;
- (d) honde, en
- (e) katte

met dien verstande dat 'n munisipaliteit ten opsigte van enige skut in sy gebied verloop aan die skutmeester kan gee om 'n kleiner getal kampe daarop in stand te hou.

8. Afmaak van gevaarlike of aansteeklike diere

(1) 'n Skutmeester mag enige geskutte dier afmaak of laat afmaak wat aan 'n aansteeklike siekte ly of wat moontlik gevaarlik vir mense of vir ander geskutte diere kan wees; met dien verstande dat geen sodanige dier afgemaak mag word nie tensy 'n veearts dit ondersoek het en met die skutmeester ooreengekom het oor die noodsaaklikheid daarvan om dit af te maak.

(2) Indien enige dier wat aan 'n aansteeklike siekte ly na 'n skut gebring word, of siek raak terwyl dit in die skut is, moet sodanige siek dier afsonderlik van ander diere aangehou word.

9. Kennisgewing van geskutte diere

(1) Elke skutmeester wat bekend is met die naam van die eienaar van 'n dier wat in sy skut is, moet sonder versuim skriftelike kennis aan sodanige eienaar gee dat genoemde dier geskut is.

(2) Indien enige dier wat geskut word 'n identifikasiemerk het soos beoog in die Wet op die Identifisering van Diere, 6 van 2002, moet die skutmeester die

prosedure volg wat in artikel 14 van die Regulasies op die Identifisering van Diere wat in GK R1683 gedateer 21 November 2003 voorgeskryf word.

(3) Waar die eienaar van 'n geskutte dier nie aan die skutmeester bekend is nie, moet hy of sy by ontvangs van so 'n dier die skut van die dier aan die naaste kantoor van die Suid-Afrikaanse Polisie diens aanmeld.

10. Byhou van skutregister

(1) Elke skutmeester moet 'n skutregister hou waarin die volgende besonderhede aangeteken word:

- (a) die datum waarop en die rede waarom alle diere wat deur hom ontvang is, geskut is;
- (b) die getal en beskrywing van sodanige diere;
- (c) die naam en woonplek van die persoon wat sodanige diere skut, en die naam en woonplek van die eienaar of vermeende eienaar;
- (d) die datum en besonderhede van die los of verkoop van die diere, na gelang van die geval, en
- (e) alle ander sake wat die munisipaliteit hom gelas om vas te stel en aan te teken.

(2) Die inskrywing onder subartikel (1)(a), (b) en (c) moet gedoen word wanneer die diere geskut word en die inskrywings onder subartikel (1)(d) en (e) moet gedoen word sodra die skutmeester in besit kom van die nodige besonderhede; met dien verstande dat geen inskrywing gedoen mag word nadat 'n geskil ontstaan het nie.

(3) In geval van die dood of besering van 'n geskutte dier moet die skutmeester 'n beskrywing van sodanige dier en die oorsaak van die dood of besering daarvan in sy skutregister aanteken.

11. Insae in en uittreksels uit skutregister

Elke skutregister moet by die skut of 'n ander goedgekeurde plek gehou word en moet op alle redelike tye ter insae wees vir enige gemagtigde amptenaar van die munisipaliteit, veearts, vee-inspekteur, en enige lid van die polisie diens of van die publiek.

12. Voorlegging van skutregisterinskrywings na skutverkoop

Elke skutmeester moet binne veertien dae na die datum van elke skutverkoop 'n afskrif aan die munisipaliteit voorlê van alle inskrywings in sy skutregister wat gedoen is sedert die datum van die vorige voorlegging en die munisipaliteit moet al sodanige afskrifte bewaar ter insae van enige persoon wat dit verlang.

13. Insae in skutregister op plek van verkoping

Wanneer 'n verkoping gehou gaan word van diere wat geskut is, moet die skutmeester of 'n persoon wat gemagtig is om die verkoping waar te neem, die skutregister saamneem na die plek van verkoping, en sodanige register moet op

die plek van verkoping kosteloos ter insae wees van alle persone wat dit verlang.

14. Skuttariewe

- (1) Die munisipaliteit kan tariewe vasstel vir die aanhou van diere in 'n skut en kan onderskei tussen verskillende soorte diere.
- (2) Elke skutmeester is geregtig om die tariewe wat deur die munisipaliteit ingevolge subartikel (1) vasgestel word te eis ten opsigte van elke dier wat ingevolge hierdie verordening geskut word.

15. Betaling

- (1) Die tariewe wat ingevolge artikel 14 vasgestel word, moet aan die skutmeester deur die eienaar van die diere wat geskut is, betaal word.
- (2) Die geskutte diere mag deur die skutmeester gehou word as sekuriteit vir die betaling van die tariewe en enige kostes deur die skutmeester aangegaan, maar indien die waarde van die diere wat geskut is meer is as die totale bedrag wat verskuldig is, en indien die eienaar nie in staat is om die vereiste bedrag te betaal nie, mag die skutmeester slegs soveel van die geskutte diere aanhou as wat voldoende is om die totale bedrag verskuldig op al die diere te verhaal, en die res van die diere moet aan die eienaar afgegee word.
- (3) 'n Skutmeester wat 'n groter getal diere aanhou as wat redelik nodig is om die bedrag in subartikel (1) bedoel, te verhaal, is teenoor die eienaar van die diere aanspreeklik vir skade gelyk word weens die aanhou van die diere.
- (4) Indien die skutmeester 'n amptenaar van 'n munisipaliteit is moet hy of sy die tariewe wat ingevolge hierdie verordening ontvang word, in die inkomste van die munisipaliteit stort op die tye soos bepaal deur die munisipaliteit se departement wat finansies verantwoordelik is.
- (5) Geen skutmeester mag 'n geskutte dier los nie tensy die voorgeskrewe tariewe betaal is nie.

16. Kennisgewing van verkoping

- (1) Elke skutmeester moet-
 - (a) wanneer 'n geskutte dier nie binne ses dae na die datum waarop dit geskut is opgeëis is nie, die munisipaliteit in kennis stel dat sodanige dier op 'n openbare veiling verkoop sal word en die datum, tyd en plek van die veiling moet vermeld word;
 - (b) die munisipaliteit van besonderhede voorsien rakende die spesie, merke en onderskeidende kenmerke (as daar is) van sodanige dier;
 - (c) wanneer hy of sy sodanige kennisgewing aan die munisipaliteit stuur, 'n afskrif daarvan op een of ander duidelik sigbare plek by of naby die skut opplak tot die dag van die verkoping; en

- (d) 'n kennisgewing dat 'n geskutte dier verkoop gaan word, publiseer in 'n nuusblad wat sirkuleer in die regsgebied van die munisipaliteit waar die skut geleë is.
- (2) Die koste van 'n kennisgewing beoog in subartikel (1) is van die eienaar van die geskutte dier verhaalbaar en word geag deel uit te maak van die bedrag wat afgetrek moet word van die opbrengs van die verkoop van 'n dier.
- (3) Indien die eienaar van 'n geskutte dier onbekend is en die opbrengs van die verkoop nie die bedrag soos voornoem dek nie, moet die munisipaliteit die tekort goed maak.

17. Afslaer

- (1) Elke verkoping van geskutte diere moet-
 - (a) behartig word deur die skutmeester of 'n persoon wat behoorlik deur die betrokke munisipaliteit daartoe gemagtig is, en
 - (b) begin op 'n tyd en gehou word op 'n dag wat deur die afslaer vasgestel is ingevolge artikel 16(1)(a).
- (2) Niemand wat 'n skutverkoping waarneem, mag regstreeks of onregstreeks belang hê by enige koop by 'n verkoping aldus deur hom waargeneem nie.

18. Verkoping van diere

By elke sodanige verkoping-

- (a) mag geen dier te koop aangebied word nie tensy dit minstens twee weke geskut is;
- (b) moet alle diere, uitgesonder skape en bokke, stuksgewys verkoop word;
- (c) moet skape en bokke in troppe van hoogstens tien verkoop word en mag skape en bokke, of skape of bokke met verskillende oor- of brandmerke in geen omstandighede saam in dieselfde trop verkoop word nie;
- (d) moet diere vir kontant verkoop word, en moet die opbrengs, minus die bedrag van tariewe betaalbaar ten opsigte van sodanige diere by ontvangs daarvan deur die skutmeester aan die munisipaliteit oorhandig word om aan die eienaars van die diere wat verkoop is betaal te word; met dien verstande dat-
 - (i) indien in enige besondere geval die diere wat verkoop word nie voldoende opbrengs lewer om die bedrag van sodanige skutgelde en skadevergoeding en gelde, koste en tariewe soos voornoem te op te lewer nie, die opbrengs in die eerste instansie aangewend moet word om die vergoeding wat aan die skutmeester verskuldig is te betaal, en indien genoemde opbrengs onvoldoende is om sodanige vergoeding te dek, die saldo van die vergoeding deur die munisipaliteit aan die skutmeester betaal word;
 - (ii) geld wat die opbrengs is van die verkoop van 'n geskutte dier soos voornoem wat vir 'n tydperk van twaalf maande in besit van die

- munisipaliteit bly sonder dat dit deur die eienaar van sodanige dier opgeëis word, die eiendom van sodanige munisipaliteit word;
- (e) mag die munisipaliteit 'n reserweprys vasstel vir enige dier wat te koop aangebied word, en
 - (f) mag die afslaer enige dier aan die verkoping onttrek as die hoogste bod wat gedoen word nie voldoende is nie, ongeag of 'n reserweprys deur die munisipaliteit vasgestel is of nie.

19. Onwettige skut van diere en boetes

Enige persoon wat 'n dier onwettig skut, pleeg 'n misdryf.

20. Verhaal van verlies ten opsigte van diere geskut uit gebied van ander munisipaliteit

Indien die munisipaliteit enige verlies ly as gevolg van die skut van diere in 'n skut onder sy beheer, welke diere binne die regsgebied van 'n ander munisipaliteit oortree het, kan die munisipaliteit sodanige verlies van sodanige ander munisipaliteit verhaal.

21. Gebruik, aanhouding en mishandeling van diere

Niemand mag 'n dier wat gevind word waar dit oortree, buitensporig vinnig aanjaag of dit pla of mishandel nie.

22. Appél

Enige persoon wie se regte deur 'n besluit van die munisipaliteit geraak word, mag teen die besluit appelleer met insluiting van die redes vir sodanige appél, ingevolge artikel 62 van die Wet op Plaaslike Regering: Munisipale Stelsels, Wet 32 van 2000, gerig aan die Munisipale Bestuurder binne 21 dae vanaf datum van kennisgewing van die besluit.

23. Strafbepalings

'n Persoon wat enige bepaling van hierdie verordening oortree of versuim om daaraan te voldoen, pleeg 'n misdryf en kan by skuldigbevinding –

- (a) 'n boete of gevangenisstraf opgelê word, of sodanige boete of gevangenisstraf, of beide sodanige boete en sodanige gevangenisstraf; en
- (b) in die geval van 'n voortgesette misdryf, 'n bykomende boete of 'n bykomende tydperk van gevangenisstraf of sodanige bykomende gevangenisstraf sonder die opsie van 'n boete of beide sodanige bykomende boete en gevangenisstraf vir elke dag waarop sodanige misdryf voortduur; en
- (c) 'n verdere bedrag gelyk aan enige koste en uitgawes wat die hof bevind deur die munisipaliteit aangeaan is weens sodanige oortreding of versuim.

24. Teenstrydigheid met ander wetgewing

In die geval van teenstrydigheid tussen enige bepaling van hierdie verordening en Nasionale- en Provinsiale wetgewing, standarde, beleid of riglyne, sal sodanige Nasionale- en Provinsiale wetgewing, standarde, beleid of riglyne voorrang geniet.

25. Herroeping van verordeninge

Die bepalings van enige verordeninge wat voorheen deur die munisipaliteit of deur enige afgeskafte munisipaliteit wat nou by hierdie munisipaliteit ingelyf is, afgekondig is, word hierby herroep in soverre dit verband hou met sake wat in hierdie verordening voorsien word, en insoverre dit van toepassing gemaak is op die munisipaliteit deur die volmag vir die uitvoering van magte en funksies kragtens artikel 84(3) van die Wet op Plaaslike Regering: Munisipale Strukture, (Wet 117 van 1998).

26. Kort titel en inwerkingtreding

Hierdie verordening staan bekend as die Verordening insake die Skut van Diere en tree in werking op die datum van publikasie daarvan in die Provinsiale Koerant.